



16. august 2023

UKA2023/74

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Inatsit tunngaviusussaq pillugu Isumalioqatigiissitat tunngaviusumik inatsisissamut missingiusiaat pillugu innuttaasut akornanni isummersoqatigiinnissamut periarfissiisoqarnissaanut Naalackersuisut peqquneqarnissaannik Inatsisartut aalajangiiffigisassaattut siunnersuut.

(Siumup Inatsisartuni gruppia)

Tunngavilersuut:

Inatsisartut suliaakkiissuteqarnerisigut Inatsit Tunngaviusussaq pillugu Isumalioqatigiissitat 2017-mi pilersinneqarput, isumalioqatigiissitalu isumaliutissiissutaat 29. april 2023 Naalackersuisunut Inatsisartunullu tunniunneqarpoq.

Tunngaviusumik inatsiseqarnek nunanut uatsinnut sanilliuttakkatsinnut pingaaruteqarluni inissisimasarpoq, tunngaviusumik pineqartarmat, inatsisit inuiaqatigiinni qaqugukkulluunniit suliarineqartartussat qanoq tunngavissinneqarsimanissaanik erseqqissunik allassimasuuteqarnissaq toqqissisimanarnerpaajusarmat .

Naak tunngaviusumik inatsiseqarnissaq naalagaaffinngornissamut immini piomasaaqaataanngikkaluartoq, Siumut isumaqarpoq, inuiaqatigiitsinni pissaanerup, pisinnaatitaaffiit assigisaallu qanoq nalorninaatsumik aalajangersaaffigineqarsimallutillu sammivilersorneqarsimanissaat pingaaruteqartoq.

Taamaattumik Siumut isumaqarpoq, qinikkatut pisussaaffigipput suliarujussuaq uatsinnut tunniunneqartoq inuiaqatigiinnut ingerlateqqissallugu naggataatigullu inuiaqatigiinnit taasisutigineqarnissaa naammassissallugu.

Suliassarlu tullinguuttoq unaavoq, Tunngaviusumik Inatsisissatut suliaq inuiaqatigiinni oqaloqatigiissutigalugu aallartissasoq. Tamanna pisariaqartutut Siumumi isigaarput, pingaartumik Isumalioqatigiissitat ukiuni tallimani sulinerminni naammattumik innuttaasunik peqataatitsisimanngimmata, ilaatigut Coronap atugaanerata nalaanni uninngatitsisariaqalersimaneq pissutigalugu.



Suliassanuttaaq ilaapput Inatsit Tunngaviusussaq pillugu Isumalioqatigiissitat isumaliutissiissutaat naqitanngorlugu siammarterneqarnissaata naammassinissaa inuiaqatigiinnilu oqaloqatigiissutigereerutsigu aamma innuttaasut tamatta apeqqummut taasitneqarnissarput tikinneqartussaassammat.

Taamaattumik Siumup Inatsisartuutitai ataatsimoortut siunnersuuteqarput, tunngaviusumik inatsisissap inuiaqatigiinni oqaloqatigiissutigineqarnissaa siunertaralugu Inatsisartut immikkut ittumik aningaasaliissuteqassasut. Taamaaliornitsigut innuttaasut Isumaliutissiissut pillugu oqaloqatigiinnermikkut qanoq isummernerat qularnaatsumik ilisimalissagatsigu.

Siumumi isumaqarpugut, tunngaviusumik inatsisissaq isumalioqatigiissitanit suliarineqarsimasoq innuttaasunit isummersorfigineqareerpat taasisitsinissaq tullinnguutissasoq. Suliaq tunngaveqarluartumik peqataatitsilluarnikkullu ingerlanneqarpat, Siumumi qularutigingilarput innuttaasut amerlanerussuteqarluartut Tunngaviusumik Inatsimmut tunuliaqutsiiumaartut.

Pisortanut aningaasatigut allaffissornikkullu kingunerisassai:

Siumup gruppiata siunnersuutigaa, Inatsit Tunngaviusussaq pillugu Isumalioqatigiissitat isumaliutissiissutaat inoqutigiinnut tamanut atuaruminartunngorlugu nassiussuunneqassasoq, tamannalu ukioq nutaaq aallartippat pissasoq. Tamatuma malitsigisaanik tamakkiisumik piffissaqarfigalugu ataqatigiissaarillutik sulisut marluk pisariaqartinneqassasut naatsorsuutigineqarpoq, sulinerlu ukiunik marlunnik sivisussuseqartussatut ilimagineqarpoq. Ukiumut aningaasaliissutissatut naatsorsuutigineqarput 2. mio. kr. Siumup gruppiata ilisimavaa, pineqartoq pillugu naleqqussaasariaqartarnissaq pisariaqalersinnaassammat.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.